

文忠集

卷之四

文忠集卷九

唐 顏 真 卿 撰

碑

晉紫虛元君領上真司命南嶽夫人魏夫人仙壇

碑銘

夫人諱華存字賢安任城人晉司徒劇陽文康公舒之
女也師于小有清虛真人王褒哀命中候上仙范邈爲
立傳其略云夫人挺瓊蘭之流映體自然之靈璞志逸
雲霞明潔鮮蔚天才卓異立標幽拔少讀老莊三傳五

經百子無不該覽性樂神仙味真慕道少服胡麻散茯苓丸吐納氣液攝生夷靜親戚往來一無漏見常欲別居閒處父母不許年二十四強適太保掾南陽劉君幼彥生二子璞遐幼彥後爲修武令夫人心期幽靈精誠苦盡逮子息粗立乃離隔室宇齋于別寢清修百日忽有太極真人安度明東華大神方諸青童扶桑碧河湯谷神王景林真人小有仙王清虛真人王哀來降哀謂夫人曰聞子密緯真氣太帝君敕我授子神真之道青童曰清虛爾之師也度明曰子苦心求道道今來矣景

林曰虛皇鑒爾勤感太極已注子于玉札子其勗哉青童又曰子不受聞上道內法晨景玉經者仙道無緣得成也後日當會陽洛山中爾勤密之矣三君乃命侍女開玉笈出太上寶文八素隱身大洞冥經高仙羽玄等書三十一卷手授夫人焉此皆王君昔遇南極夫人西城真人王方平于陽洛山所受之本經也山中有洞臺是清虛之別宮王君至是北向祝誓于夫人曰太上三元九皇高真虛微八道玉清玉泉哀爲太帝所救下魏華存又說太極白簡青籙金刻玉文有得見此三十一

卷書者之姓名也凡此寶書起自清虛真人受太師西城王君紫元夫人從是當十人得之以白玉爲簡青玉爲字至是夫人爲四矣于是景林又授夫人黃庭內景經令晝夜誦讀萬遍得乃洞觀鬼神此乃不死之道也于是四真吟唱各命玉女彈琴擊鐘吹簫合節而發歌歌畢王君乃解語夫人向所授書存思指歸寶經節度行事口訣諸要料訖徐乃別去凡一夕一日共會在曲靜之中自此之後王君及西城真人諸元君夫人所有來往或與隔壁共庭初不駭悟已而幼彥以暴疾殞世

值天下荒亂夫人撫養內外傍救窮乏超羣先覺乃攜細小徑來東南及見息各大並處官位至于守靜之思與日而進也凡在世三十八年以成帝咸和九年歲在甲午王君乃與東華青童來降與夫人靈藥兩齋使頓服之剋期會于陽洛宮夫人服藥稱疾閉目寢息久而不食七日夜半太一玄仙遺輦車來迎夫人用藏具之法託形神劍化成死骸始終外朗仙化內逸其變隱適從此而絕子璞時爲庾司空司馬遐時爲陶太尉從事中郎安城太守故夫人自此隱化淪景須臾至陽洛山

明日青童君太極四真人清虛王君三天法師張道陵
等凡四十七真人降教夫人于隱元之臺王君令夫人
清齋五百日讀大洞真經并分別登真祕奧道陵授以
新出明威章案原本入靜存祝吏兵符錄之訣衆真各
缺一字
標至訓三日而去道陵所以備教委曲者以夫人在世
爲女官祭酒領職理故也夫人遂修齋讀經誦研萬過
積十六年顏如少女于是龜山九靈太真西王母金闕
聖君南極元君乃共來迎夫人遂白日升晨北詣上清
宮玉闕之下太微天帝中央王老君三素高元君太上

玉晨大道君太素三元君扶桑太帝君金闕後聖君各
令使者致命授夫人玉札金文位爲紫虛元君領上真
司命南嶽夫人比秩仙公使治天台大霍山洞臺之中
主下訓奉道教授當真仙者而男之高仙曰真人女曰
元君于是夫人受錫事畢王母及金闕聖君南極元君
各去使夫人于王屋小有之中更齋戒三日畢九微元
君龜山王母三元夫人馮雙禮珠泉諸衆仙並降夫人
于小有清虛上宮絳房之中時夫人與王君爲賓主焉
神肴羅陳金觴四奏各命侍女陳曲成之鈞九雲合節

八音零粲于是西王母擊節而歌歌畢馮雙禮珠彈雲
璈而答歌餘真人各歌須臾司命神仙請隸屬及南嶽
神靈迎官並至虎旂龍輦激躍數百里中西王母諸真
乃共與夫人東南行俱詣天台霍山臺又便道過句曲
金壇茅叔申宴會二日二夕又共適于霍山夫人安駕
玉宇然後各別初王君告夫人曰學者當去疾除病因
授甘草丸所謂穀仙方也夫人服之而仙夫人能隸書
爲王君立傳事甚詳悉又述青精飴飴注黃庭內景經
自後屢降茅山子璞後至侍中蒙使傳法于司徒琅琊

王舍人楊羲護軍長史許穆穆子玉斧並升仙事具陶
弘景真誥所呼南真卽夫人也初夫人旣渡江徧遊名
山至臨川郡臨汝水西立壇置精舍院東百餘步造冢
壙又于石井山建立壇場往來遊憩歲月深久榛蕪淪
翳雖備載圖經而略遺無跡有唐女道士黃令微道行
高遠八十而有少容蹠屣而行奔馬不及時人見其顏
色殊異號曰花姑聞夫人靈迹長壽二年歲在壬辰冬
十月乃訊于洪州西山道士胡超超能通神明遙指郭
南六里烏龜原有石龜每犯田苗被人擊首折其處是

也姑與道流尋訪見龜在壇中央其下得尊像油甕鎗
刀燈盞之類俄夢夫人指九曲池于壇南獲之磚砌猶
在景雲中睿宗使道士葉善信將繡像幡花來修法
仍于壇西置洞靈觀度女道士七人開元初玄宗使醮
祭祈禱不絕每有風雨或聞簫管之聲入室禮謁必須
嚴潔不爾必有蛇虎驚吼之異時時有雲如烏鳥羣飛
垂帶直下壇上倏忽不見西出如向井山前後非一已
而花姑舂蠶間如有告者曰井山古跡汝須崇建俄聞
異香西來姑行宿洞口聞鐘磬之音遲明入山果遇壇

殿餘趾遂建立屋宇屢聞仙梵之響環壇數里有採斫
及不精潔者必有怪異之警有野象中箭來投花姑姑
爲拔之後每齋前則銜蓮藕以獻姑開元九年姑欲上
升告弟子曰勿釘吾棺可以絳紗羈之已而霆雷震擊
紗上有孔大如雞卵棺中惟有被覆木簡屋上穿可容
人座前奠心數日生蔓結實如桃者二每至忌辰則風
雨鬱勃直入室內玄宗聞而駭之覆視明白使道士蔡
偉編入後仙傳二十九年春三月乙酉使道士齋龍壁
來醮忽有白鹿自壇東出至冢間而滅五色仙蛾集壇

上刺史范陽張景佚以為聖德感應立碑頌述天寶八
 載以夫人得道升仙之所度女道士二人見修香火大
 歷三年真卿叨刺是州言崇禮謁郊郭蒙邃萑蒲震驚
 女弱曹逃豺狼窟聚真儀如在壇殿巋然瞻仰徘徊悄
 焉若失有仙壇觀道士譚仙巖者修真自遠法侶是宗
 請以男官黃道士二七人抽隸洞靈共申灑掃高行女
 道士黎瓊仙七人萃居壇院精力住持已久率勵往來
 增修觀宇從之不日適暨厥成仙迹之載崇師之力也
 敢備其本末而為頌云銘曰

紫虛元君惟魏夫人位列五嶽名高七真凝華台盾尊
 志劉嬪太帝昭懇清虛降神羣仙畢會玉笈斯陳服道
 日損精心益勤蛻形神劔託馭颿輪適抵陽洛邁登隱
 元黃庭朗詠白日升晨西降王母東過叔申傳法侍中
 許楊或作陽非為鄰伊昔南渡爰居汝濱壇場處所埋沒荒
 榛實賴花姑諭于胡尊果獲靈迹烏龜之原次尋井山
 實叶曩言嫣然簡解紗冪空存野象銜藕靈瓜吐根怪
 異昭彰不可殫論二聖竦駭屢崇明因于嗟女弱香火
 堙淪真卿刺州謁拜思頻乃命仙子增修鼎新花姑侍

傍異代同塵曷表玄德銘功翠珉垂諸來裔埜北無垠
撫州臨川縣井山華姑仙壇碑銘

華姑者姓黃氏諱令微撫州臨川人也少乃好道風神
卓異天然絕粒年十二度爲天寶觀女道士年八十髮
白面紅如處子狀時人謂之華姑蹠屣而行奔馬不及
聞魏夫人仙壇在州郭之南草木榛翳結廬求之不得
長壽二年歲在壬辰冬十月壬申朔訪于洪州西山胡
天師天師名超能役使鬼神見其懇切遙指姑所居南
二百步曰烏龜原中有石龜每蹂踐田苗百姓患之乃

擊斷其首卽其處也明日與姑登山顧望西面有池水
焉天師謂姑曰池中有所見乎曰無師遂舉左手令姑
自腋下觀之四仙浴焉師曰爾有道分必當得之因留
與語數日虔誠尋訪遂獲石龜于壇中央掘其下得尊
像及刀鋸各一油鬘五口燈盞數十箇天后聞之盡收
入內姑嘗于旦夕精思想象之間忽有告曰壇南有九
曲池汝可開之姑從而獲焉塼砌盡在他日有異香綵
雲從西南而來其夕夢有人謂姑曰井山道場何不修
葺姑未及往忽然感疾姑曰得非違尊教所致乎翌日

病愈又聞異香而宿于谷口聞鐘聲遲明入山里獲壇殿地砌北半峯有自然石井深可三尺闊丈餘故名井山天欲雨則雲霧先起姑既建置精舍時聞仙梵之音環壇五七里間莫敢樵採茹遂灑掃修葺極其力焉人或不潔不誠必遭蛇虎怪異之警迷不能出矣至今猶然有野象爲獵人所射來姑前姑爲拔箭其後每至齋時卽銜蓮藕以獻姑開元九年欲上昇之際忽謂弟子曰不須釘吾棺可以絳紗冪之數夕有雷震繞祖紗頂孔如雞卵屋穿容人棺中惟被覆木簡而已弟子奠瓜

數日生蔓長數尺結實二顆其大如桃姑同學弟子黎瓊仙恒服茯苓胡麻絕粒四十餘秋年八十齒髮不衰六七歲時親觀其事每至忌辰卽風雲翳鬱直入室內村墅路人往往見綵雲白鶴飛入洞口清齋行道時每有一朱鬃白馬在壇側逼之則奔而出外捨之則隨而復來靈異昭彰不可談悉仙巖史亦同左通玄等每至三元恒修齋醮大歷三年真卿獲刺是州明年春三月山下有女道士曾妙行夢一女師令上層華樹層層撥食及悟猶飽因是不食嘗于觀中見黎瓊仙跪而拜曰

夢中所見乃尊師也因請依之于今覺韶顏潤澤度修
香火于此山遐邇駭慕焉於戲昔麻姑得道而名山南
真仙昇于龜原華姑翫于茲嶺瓊仙妙行接踵而出非
夫天地胥蟻從古以然則何以仙氣氤氳若斯者矣真
卿幸因述職親觀厥猷若默而不言則來者奚述乃爲
銘曰

綽綽華姑真仙品徒芳蓮比色逸駿爭驅南郭從魏西
山訪胡腋窺浴泉原獲龜烏靈跡旣儼曲池猶汚鼎新
廟貌煥發規模名曰井山終焉不逾象來藕獻馬貝鬃

朱簡解空存紗穿上徂奠瓜吐實藹室雲趨妙行精持
高真是俞勒銘翠琰永播立都

浪跡先生立真子張肅和碑銘

士有牢籠太虛搢掖立造擺元氣而詞鋒首出軋無間
而理窟肌分者其惟立真子乎立真子姓張氏本名龜
齡東陽金華人父遊朝清真好道著南華象罔說十卷
又著沖虛曰馬非馬證八卷代莫知之母留氏夢楓生
腹上因而誕焉年十六遊太學以明經擢第獻策肅宗
深蒙賞重令翰林待詔授左金吾衛錄事參軍仍改名

志和字子同尋復貶南浦尉經量移不願之任得還本貫既而親喪無復宦情遂扁舟垂綸浮三江泛五湖自謂烟波釣徒著十二卷凡三萬言號玄真子遂以稱焉客或以其文論道縱橫謂之造化鼓吹京兆韋詣為作內解玄真又述太易十五卷凡二百六十有五卦以有無為宗觀者以為碧虛金骨兄浦陽尉鶴齡亦有文學恐玄真浪跡不還乃于會稽東郭買地結茅齋以居之閉竹門十年不出吏人嘗呼為掬河夫執畚就役曾無忤色又欲以大布為褐裘復徐氏聞之手為織績一製

十年方著不解所居草堂椽柱皮節皆存而無斤斧之跡文士效柏梁賦作歌者十餘人浙江東觀察使御史大夫陳公少遊聞而謁之坐必終日因表其所居曰玄真坊又以門巷湫隘出錢買地以立閘閙旄曰迴軒巷仍命評事劉太真為敘因賦柏梁之什文士詩以美之者十五人既門隔流水十年無橋陳公遂為創造行者謂之大夫橋遂作告大夫橋文以謝之常以豹皮為度驪皮為屨隱素木几酌班螺盃鳴榔杖挈隨意取適垂釣去餌不在得魚肅宗嘗錫奴婢各一玄真配為夫妻

名夫曰漁僮妻曰樵青人問其故漁僮使捧釣收綸蘆
中鼓柁樵青使蘇蘭薪桂竹裏煎茶竟陵子陸羽校書
郎裴修嘗詣問有何人往來答曰太虛作室而共居夜
月爲燈以同照與四海諸公未嘗離別有何往來性好
畫山水皆因酒酣乘興擊鼓吹笛或閉目或背面舞筆
飛墨應節而成大歷九年秋八月訊真卿于湖州前御
史李暉以縑帳請焉俄揮灑橫布音布而織纒霏拂亂槍
而攢毫雷馳須臾之間千變萬化蓬壺髣髴而隱見天
水微茫而昭合觀者如堵轟然愕眙在坐六十餘人立

真命各言爵里紀年名字第行于其下作兩句題目命
酒以蕉葉書之授翰立成潛皆屬對舉席駭歎竟陵子
因命畫工圖而次焉真卿以舴艋旣收請命更之答曰
儻惠漁舟願以爲浮家泛宅沿泝江湖之上往來茗雪
之間野夫之幸矣其詼諧辯捷皆此類也然立性孤峻
不可得而親疎率誠澹然人莫窺其喜愠視軒裳如草
芥屏嗜欲若泥沙希跡乎道丈夫同符乎古作者莫可
測也忽焉去我思德茲深曷以真懷寄諸他山之石銘
曰

邈玄真超隱淪齊得喪甘賤貧泛湖海同光塵宅漁舟
垂釣綸輔明主斯若人豈烟波終此身

茅山玄靖先生廣陵李君碑銘

先生姓李氏諱含光廣陵江都人本名弘以孝敬皇帝
廟諱改焉二十一代祖宏江夏太守避王莽徙居晉陵
遂爲郡人高祖文疑陳桂陽國侍郎曾祖榮皇朝雷
州司馬祖師龕隱居以求其志徙于江都父孝感博學
好古雅修彭聃之道與天台司馬鍊師子微爲方外之
交尤以篤慎著于州里攷行議謚曰正隱先生丹琅琊

王氏賢明有德行先生孩提則有殊異晬日獨取孝經
如捧讀焉羈州好靜處誦習墳典年十八志求道妙遂
師事同邑李先生遊藝數年神龍初以清行度爲道士
居龍興觀尤精老莊周易之深趣執喪過哀口不嘗甘
旨之味食惟穢麥而已封植膳羞皆經其手號毀骨立
親族莫不傷之開元十七年從司馬鍊師于王屋山傳
授大法靈文金記一覽無遺綜核古今該明奧旨玄宗
知先生徧得子微之道乃詔先生居王屋山陽臺觀以
繼之歲餘請居茅山纂修經法頻徵皆謝病不出天寶

四載冬乃命中官齋醮書徵之既至延入禁中每欲諮稟必先齋沐他日請傳道法先生辭以足疾不任科儀者數焉立宗知不可強而止先生嘗以茅山靈跡剪焉將墮真經祕籙亦多散落請歸修葺乃特詔于楊許舊居紫陽以宅之仍賜絹二百疋法衣兩副香爐一具御製詩及序以餞之又禁于山側採捕漁獵食葷血者不得輒入公私所禱咸絕牲牢先生以六載秋到山是歲詔書三至渥澤頻繁暉映崖谷初山中有上清真人許長史楊君陶隱居自寫經法歷代傳寶時遭喪亂散逸

無遺先生奉詔搜求悉備其跡而進上之先時立宗將求大法請先生爲師先生竟執謙沖辭疾而退泉七載春立宗又欲受三洞真經以其年春之三月中官齋醮書云其月十八日剋授經誥是日于大同殿溲修其事遂遙請先生爲古師并賜衣一襲以伸師資之禮因以立靖爲先生之嘉號焉仍詔刻石于華陽洞宮以誌之是歲夏五月隱居先生合丹之所有芝草八十一莖散生于松石之間詔碑先生與中官啟告靈仙緘封表進夏又詔以紫陽觀側近二百戶太平崇元兩觀各一百

戶並蠲其官徭以供香火秋七月又徵先生既至請居道觀以養疾九載春辭歸舊山其年夏六月前生靈芝之所又產三百餘莖煌煌秀異人所莫覩先生又圖而奏之是歲冬又徵先生于紫庭別院館之十載秋先生又懇辭告老御製序詩以餞之十有一載先生奉詔與門人韋景昭等于紫陽之東鬱岡山別建齋院立心誠肅是夜仙壇林間遍生甘露因以上聞特詔嘉異初隱居先生以三洞真法傳昇玄先生昇玄付體玄先生體玄付正一先生正一付先生自先生距于隱居凡五葉

矣皆總集妙門大正真法所以茅山爲天下道學之所宗矣於戲是非可齊也我物均焉生死可忘也覺夢同焉如出可域心于變化之際哉先生以大歷己酉歲冬十一月十有四日遁化于茅山紫陽之別院春秋八十有七其年十二月八日門人赴喪而至者凡數千人號奉冠舄遷窆于雷平山之西陲遺命以松棺竹杖木几水瓶香奩香爐置藏門內弟子等仰奉嘉猷克遵儉德先生器識真淳業行高古道窮情性之本學冠天人之際所以優游句曲鬱爲王者之師出入明庭特寵肩輿

之貴是知順風而問昔稱于黃帝望山而請今見于玄宗矣又博覽羣言長于著撰嘗以本草之書精明藥物事關性命難用因循著音義兩卷又以老莊周易爲潔靜之書著學記義略各三篇內學記二篇以續仙家之遺事皆名實無違詞旨該博初先生幼年頗工篆籀而隸書尤妙或賞之云賢于其父因投筆不書玄宗詔山人王旼強請先生楷書上經一十三紙以補楊許之闕先生能卜陰陽數術之理而不以藝業爲能極于轉鍊服食之事而不以壽養爲極但冥懷素樸妙味玄津非

夫博大之至人孰能盡于此真卿乾元二年以昇州刺史充浙江西節度欽承至德結慕玄微遂專使致書于茅山以抒誠懇先生特令韋鍊師景照復書于真卿恩眷綢繆足勵超然之至然可師可仰望紫府而非遙王事不遑寄白雲而悠遠泉大歷六年真卿罷刺臨川旋舟建鄴將宅心小嶺長庇高蹤而轉刺吳興事乖夙願徘徊郡邑空懷尊道之心瞻望林巒永負借山之記而景昭泉郭閔等以先生茂烈芳猷願銘金石乃邀道士劉明素來託斯文真卿與先生門人中林子殷淑遺名

子韋渠牟嘗接采真之遊緒聞含一之德敢強名于巷
黨曷足辨于鴻蒙其詞曰

抱一混茫人之紀綱先生以之氣王神強乃啟玄旨玄
門以彰乃為帝師帝道惟康甘露呈瑞靈芝效祥上士
云感高風再揚鶴返仙廟雲辭帝鄉退歸而老妙識行
藏德本無累道心有常寔曰形解孰云坐亡伐石表墓
勒銘傳芳谷變陵遷厥跡彌光

文忠集卷九

文忠集卷十

唐

顏

真

卿

撰

墓碣墓誌

曹州司法參軍祕書省廳正殿二學士殷君墓碣
銘

善父母之謂孝睦昆友之謂悌孝悌也者其仁之本歟
經大緝地之謂文博古知今之謂學文學也者其德之
蘊歟誰其兼之即我伯舅殷君其人矣君諱踐猷字伯
起陳郡長平人五代祖不害舊集作不古非以孝見梁書高祖

英重周御止中大夫麟趾學士曾祖聞禮唐太子中書舍人弘文館學士祖令言校書郎淄川令父子敬太常博士吳令累葉皆以德行名義儒學翰墨聞于前朝君卽吳縣之元子幼而聰悟絕倫長而典禮不易年十三日誦左傳二十五紙讀稽聖傳一遍亦誦之博覽羣言尤精史記漢書百家氏族之說至于陰陽數術醫方刑法之流無不該洞焉與賀知章陸象先我伯父元孫韋述友善賀呼君爲總龜以龜千年五聚問無不知也君性方正志業深淳識理清遠人皆望而服之解褐杭州

參軍刺史宋璟以相國之重簡貴自居無所推揖每見君必特加禮敬政事之諉誣者皆咨決焉開元初舉文儒異等授祕書省學士尋改曹州司法參軍麗正殿學士與韋述袁暉同修王儉今書七志及羣書四錄流別銓次皆折衷于君璟與蘇頲旣入相每引君詢以當代之務友于兄弟羣從宗黨必盡紕緩之恩長妹蘭陵郡太夫人真啣先妣也中年孀嫠遺孤十人未能自振君悉心訓獎皆究恩意故能長而有立開元九年秋七月九日有叔父臨黃尉子立之喪哀慟嘔血終于京師通

化坊之私第夫人蘭陵蕭氏司空瑀之玄孫括州司馬
宋國公興宗之女賢和齊肅秉修禮度能讀論語周易
泛觀史傳率諸婦以和義故閨範修睦焉君之捐館以
清白留遺家道索然夫人躬甘菲糲勸勉桑穡晏息晨
興以率勵僮僕行之數歲經費羨焉教誨三子攝寅克
齊等皆克負荷攝大斌令克齊高平尉爲真卿河東覆
屯軍試判官並不幸早世寅聰達有精識能繼先父之
業有大名于天下舉宏詞太子校書永寧尉箠殺謾吏
以移澄城丞久疾將歿顧瞻太夫人欲訣不忍其子監

察御史亮年未志學隱而潛盡之及寅卒斬指翦髮寘
于棺中誓事太夫人不敢渝常日及有疾不脫衣帶者
數年故白燕巢于苦楸乾元元年太夫人季女適于邠
州司法陸超板輿隨牒俄而遘疾三月朔日終于超之
官舍春秋八十有一龜童未從因權殯于三水亮以校
書郎遷壽安尉爲真卿荆南節度推官廣德二年十有
二月與弟今榮陽尉永匍匐徒步力護雙觀合耐君夫
人于新安縣之龍澗原三子坐從理命也嗚呼以君之
才之美被服純行加人數等清修素業爲代元龜竟不

文忠集 卷十
得贊皇極而叶舜倫登泰階而儀百辟不其惜矣嗟乎
仲尼聖者也終于魯司寇而君官與之比公明達者也
年纔四十八而君壽與之齊豈聖賢之道有遭遇乎將
運命之數有窮通乎茲小子所以獻疑而述報施也大
歷五年夏五月其卿以恩宥刺撫于州採石刻頌丹書
碣于墓左銘曰

殷之後昆奕葉儒門盛烈存兮君能濟美於穆不已明
德尊兮運促道長身歿名揚教義敦兮合祔先窆述遵
理命哀順孫兮高墳崔嵬龍澗之隈映鮮原兮斯焉窆

止以望吾子慰營魂兮

京兆尹兼中丞杭州刺史劔南東川節度使杜公
墓誌銘

九有無虞行師貴于衽席四方取則鈞距資乎浩穰誰
其有之則杜公其人矣公諱濟字應物京兆杜陵人皇
主客郎中續之曾孫明堂令知讓之孫贈太子少保嘉
之第三子姿度韶舉心靈敏達在家必聞旣蘊陸親之
志所居則化多稱不器之能解褐南鄭主簿州主司馬
垂引在使幕轉長杜隴西法曹皇甫旆江西採訪奏

爲推官授大理司直攝殿中侍御史賜緋魚袋尋正除
殿中歷宰郿渭南成都三縣原州刺史賜紫金魚袋戶
部郎中加朝散大夫廣德中檢校駕部郎中上柱國充
嚴武劔南行軍司馬杜鴻漸分蜀爲東西川以公爲副
元帥判官知東川節度拜太中大夫兼梓遂都防禦
使梓州刺史兼中丞時寇盜充斥公示以威信八將之
不隕公之力焉尋拜東川節度使俄而移軍復爲遂州
都督徵拜給事中間歲拜京兆少尹明日遷京兆尹出
爲杭州刺史公務清簡庭落若無吏焉不幸感風疾以

大歷十二年歲次丁巳秋七月二日辛亥薨于常州之
別館春秋五十有八夫人京兆韋氏太子中舍迪之第
三女也沈敏精深高明柔克幹夫之蠱以懋厥家生三
子四女而公卽世夫人星言晝哭躬護櫬轉與子肅以
冬十一月二十有四日壬申歸窆公于萬年縣洪原鄉
之少陵原祔先塋也嗚呼以公之志業材力宜其振揮
鱗翮凌厲清浮而命迨成山功虧長世吁足恨也真卿
忝居友婿亟接周行痛音徽之永隔感存歿其何已銘
曰

萬萬顛顛時惟杜公業先臺省政治軍戎乃尹京師乃
麾江東帝方俟理命則不融內子護喪哀哀送終

祭文

祭姪季明文

維乾元元年歲次戊戌九月庚午朔三日壬申第十三
叔銀青光祿大夫使持節蒲州諸軍事蒲州刺史上輕
車都尉丹陽縣開國侯真卿以清酌庶羞祭于亡姪贈
贊善大夫季明之靈惟爾挺生夙撰幼德宗廟瑚璉階
庭蘭玉每慰人心方期戡穀何圖逆賊問費稱兵犯順

爾父竭誠常山作郡余時受命亦在平原仁兄愛我俾
爾傳書爾旣歸止爰開土門土門旣開兇威大蹙賊臣
不久孤城圍逼父陷子死巢傾卵覆天不悔禍誰爲荼
毒念爾遭殘百身何贖嗚呼哀哉吾承天澤移牧河關
泉明比者再陷常山攜爾首櫬及茲同還撫念摧切震
悼心顏方俟遠日卜爾幽宅魂而有知無嗟久客嗚呼
哀哉尚饗

文忠集卷十

文忠集卷十一

書帖

與李太保帖

唐顏真卿撰

不審所苦何如奉計已痊復真卿緣馬病朝回已乏采
 遂馳謁謹勒參候不次謹狀十一日刑部尚書顏真卿
 狀上李太保大夫公閣下千手贊檢未得帖之謹空
 拙于生事舉家食粥來已數月今又罄竭祗益憂煎輒
 恃深情故令投告惠及少米實濟艱勤仍恕干煩也真

卿狀

陰寒不審太保所苦何如承渴已損深慰馳仰所檢贊
猶未獲望于文書細檢也病妻服藥要少鹿肉脯有新
好者望惠少許幸甚專馳謁不次謹狀二十九日刑部
尚書顏真卿狀上李太保大夫公閣下謹空

與盧倉曹帖

昨奉辭但增悵仰承已過埭不得重別情深惘然珍重
謹此不宣真卿白二十四日

與蔡明遠帖

蔡明遠
補陽人

真卿昔刺饒州卽嘗趨事及來江右無改厥勤靖言此
心有足嘉者一昨緣受替歸北中止金陵闔門百口幾
至餬口明遠與夏鎮不遠數千里冒涉江湖連舸而來
不憊晷刻竟達命于秦淮之止又隨我于邗溝之東追
攀不疲以至邵伯南埭始終之際良有可稱今旣已事
方旋指期斯復江路悠緬風濤浩然行李之間深宜尚
慎不宣真卿報

聞鄒游與明遠同來欲至采石計其不久亦合及吾淮
泗之間脫若未到見之宜傳此意遣此不宣真卿報

與夫人帖

真卿頓首奉承十四日遷厝承問悲慕不能自勝惟攀
 慕不及摧毀何堪痛當奈何痛當奈何凝寒惟動靜支
 適兒子等保侍真卿離官已久事須十間前至鄭州汴
 州已來專奉侍一日只擬一驛計過大事後發猶恐遲
 必望知此緩急勿遲滯足下不來義無獨去之法必請
 矜此狼狽所望今到汴州水下不愁河東書祭器等先
 下船去真卿十一日且發東京佇望早來早來謹不次
 真卿頓首夫人閣下十一月八日 問訊頌翹蒙郎郎

和奴光嚴深遠憶或至十三日得發

寒食帖

天氣殊未佳汝定成行否寒食以數日間得且住為佳
 耳

蔡州帖

題驛舍壁

真卿奉命來此事期未竟止緣忠勤無有旋意然中心

悵悵

悵舊集作悵非

始終不改游于波濤宜得斯報千百年間

察真卿心者見此一事知我是行亦足達于時命耳人

心無路見時事只天知

舊集後二句不載

與郭僕射書

十一月日某謹奉書于右僕射定襄郡王郭公閣下蓋
太上有立德其次有立功是之謂不朽抑又聞之端揆
者百察之師長諸侯王者人臣之極地今僕射挺不朽
之功業當人臣之極地豈不以才爲世出功冠一時挫
思明跋扈之師抗回紇無厭之請故得身畫凌煙之閣
名藏太室之廷吁足畏也然美則美矣而終之始難故
曰滿而不溢所以長守富也高而不危所以長守貴也
可不儆懼乎書曰爾惟弗矜天下莫與汝爭功爾惟不

伐天下莫與汝爭能以齊桓公之盛業片言勤王則九
合諸侯一匡天下葵丘之會微有振矜而叛者九國故
曰行百里者半九十里言晚節末路之難也從古至今
泉我高祖太宗已來未有行此而不理廢此而不亂者
也前者菩提寺行香僕射指麾宰相與兩省臺省已下
常參官並爲一行坐魚開府及僕射率諸軍將爲一行
坐若一時從權猶未可何況積習更行之乎一昨以郭
令公以父子之軍破犬羊兇逆之衆衆情忻喜恨不頂
而戴之是用有興道之會僕射又不悟前失竟率意而

指麾不顧班秩之高下不論文武之左右苟以取悅軍容爲心曾不顧百寮之側目亦何異清書攫金之士哉甚非謂也君子愛人以禮不聞姑息僕射得不深念之乎真卿竊聞軍容之爲人清修梵行深入佛海況乎收東京有殄賊之業守陝城有戴天之功朝野之人所共貴仰豈獨有分于僕射哉加以利衰塗割恬然于心固不以一毀加怒一敬加喜尚何半席之座咫尺之地洎其志哉且鄉里上齒宗廟上爵朝廷上位皆有等威以明長幼故得彝倫敘而天下和平也且止自宰相御史

大夫兩省五品已上供奉官自爲一行十二衛大將軍次之三帥三公令僕少師保傅尚書左右丞侍郎自爲一行九卿三監對之從古以然未嘗參錯至如節度軍將各有本班卿監有卿監之班將軍有將軍之位縱是開府特進並是勲官用蔭卽有高卑會誥合依倫敘豈可裂冠毀冕反易彝倫貴者爲賤所凌尊者爲卑所偪一至于此振古未聞如魚軍容階雖開府官卽監門將軍朝廷列位自有次敘但以功績旣高恩澤莫二出入主命衆人不敢爲比不可令居本位須別示有尊崇只

可于宰相師保座南橫安一位如御史臺衆尊知雜事
御史別置一榻使百寮共得瞻仰不亦可乎聖皇時開
府高力士承恩傳宣亦只如此橫座亦不聞別有禮數
亦何必令他失位如李輔國倚承恩澤徑居左右僕射
及三公之上令天下疑怪乎古人云益者三友損者三
友願僕射與軍容爲直諫之友不願僕射爲軍容佞柔
之友又一昨裴僕射誤欲令左右丞勾當尙書當侍軌
有訓對僕射恃貴張目見尤介衆之中不欲顯過今者
興道之會還爾遂非再獨八座尙書欲令便向下座州

縣軍城之禮亦恐未然朝廷公讌之宜不應若此今旣
若此僕射意只應以爲尙書之與僕射若州佐之與縣
令乎若以尙書同于縣令則僕射見尙書令得如上佐
事刺史乎益不然矣今旣三廳齊列足明不同刺史且
尙書令與僕射同是二品只校上下之階六曹尙書並
正三品又非隔品致敬之類尙書之事僕射禮數未敢
有失僕射之顧尙書何乃欲同卑吏又據宋書百官志
八座同是第三品隋及國家始升作二品高自標致誠
則尊崇向下擠排無乃傷甚況再于公堂獨咄常伯當

為令公初到不願紛披僂俛就命亦非理屈朝廷紀綱
須共存立過爾隳壞亦恐及身明天子忽震電含怒責
戮彝倫之人則僕射其將何辭以對

贊

李侍御寫真贊 并序

前殿中侍御史正議大夫行洛陽縣令隴西李

構 年三十七

洛陽精堅強其稱賢粉纈圖出風規宛然眸容昭寫卓
立神全舉板迎揖吾將答焉

題名

華嶽廟題名

皇唐乾元元年歲次戊戌冬十月戊申真卿自蒲州刺
史蒙恩除饒州刺史十有二日辛亥次于華陰與監察
御史王延昌大理評事攝監察御史穆寧評事張澹華
陰令劉嵩主簿鄭鎮同謁金天王之神祠

東林寺題名

唐永泰丙午歲真卿以罪佐吉州夏六月壬戌與殷亮

韋桓

桓舊集
作柏非

尼賈鎰

鎰舊集
作鎰非

同次于東林寺則同情熙

文忠集 卷十一 吳師惟校
怡二公惠秀正義二律師泉楊鵬存焉仰盧阜之鑪峯
想遠公之遺烈升神運殿禮僧伽衣觀生法師塵尾扇
謝靈運翻涅槃經貝多梵夾忻慕之不足聊寫刻于李
張二公耶舍禪師之碑側

西林寺題名

唐永泰丙午歲真卿以疎拙貶佐吉州夏六月癸亥與
殷亮韋桓尼賈鎰楊鵬憩于西林寺有法真律師深究
清淨毗尼之學卽律祖師志恩之上足余內弟正義之
阿闍黎也緬懷遠見二公之遺烈導余躋重閣示余以

張僧繇畫盧舍那佛像泉梁武帝蹙線繡鉢袋因寓題
歐陽公所撰永公碑陰

靖居寺題名

唐永泰二年真卿以罪佐吉州聞青原靖居寺有幽絕
之致御史韓公涉刺史梁公乘嘗見招欲同遊而不果
大歷二年十月壬寅評事韋甫已使將歸乃與別駕李
案原本清河房澄同官主簿陸涓甫男七步真卿子姪
缺二字蔡頓泚頤肝等同宿于下坊明日以僧明則智清而登
禮焉因覩行思天師經始雙泉之靈迹道契律師纂成

原本路之祕藏徘徊瞻仰乃援翰而勒于碑陰

題湖州碑陰

太保謝公東晉咸和中以吳興山水清遠求典此郡郡西至長城縣通水陸今尚稱謝公塘及遷去郡人用懷思刻石記功焉歷代至皇唐天寶末羣盜起公之碑誌失于所在眷求蕪沒深為愴然借舊史遺文敬刊息石公之雅量引度蓋嗟嘆之不足

文忠集卷十一

文忠集卷十二

唐顏真卿撰

序

尚書刑部侍郎贈尚書右僕射孫逖文公集序

古之為文者所以導達心志發揮性靈本乎詠歌終乎雅頌帝庸作而君臣動色王澤竭而風化不行政之興衰實繫于此然而文勝質則繡其鞶帨而血流漂杵質勝文則野于禮樂而木訥不華歷代相因莫能適中故詩人之賦麗以則詞人之賦麗以淫此其效也漢魏已

還雅道微缺梁陳斯降宮體聿興旣馳騁于末流遂受嗤于後學是以沈隱侯之論謝康樂也乃云靈均已來此未及覩盧黃門之序陳拾遺也而云道喪五百歲而得陳君若激昂頽波雖無害于過正權其中論不亦傷于厚誣何則雅鄭在人理亂由俗桑間濮上胡爲乎純古之時正始皇風奚獨乎凡今之代蓋不然矣其或斌斌彪炳郁郁相宣膺期運以挺身奄寰瀛而首出者其惟僕射孫公平公諱述河南鞏人其先自樂安武水寓于涉而從焉父嘉之以詞學登科官至宋州司馬公風

裁激明天才傑出學窮百氏不好非聖之書文統三變特深稽古之道故逸氣上躋而高情四達羌索隱乎混元之始表獨立于常均之外不其盛歟年數歲卽好屬文十五時相國齊公崔日用試土火爐賦公雅思道麗授翰立成齊公駭之約以忘年之契爾後遂有大名故其試言也年未弱冠而三擅甲科吏部侍郎王丘試竹簾賦降階約拜以殊禮待之相國燕公張說覽其策而心醉其序事也則伯樂川記及諸碑誌皆卓立千古傳于域中其爲詩也必有逸韻佳對冠絕當時布在人口

其詞言也則宰相張九齡欲捥疵瑕沈吟久之不能
易一字公之除庶子也苑咸草詔曰西掖掌綸朝推無
對議者以爲知言凡斯夥多庸可悉數故燕國深賞公
才俾與張九齡許景先韋述同遊門庭命子均均施伯
仲之禮江夏李邕自陳州入計繕寫其集齋以詣公託
知己之分其爲先達所重也如此公文雅有清鑒典攷
功時精覈進士雖權要不能逼所獎擢者二十七人數
年間宏詞判等入甲者一十六人授校書者九人其餘
咸著名當世已而多至顯官明年典舉亦如之故言第

者必稱孫公而已夫然信可謂人文之宗師國風之哲
匠者矣公凡所著詩歌賦序策問贊碑志表疏制誥等
不可勝紀遭二朝之亂多有散落子宿絳成等夙奉過
庭之訓咸以文章知名同時臺省乃編次公文集爲二
十卷列之於左庶平好事者傳寫諷誦以垂乎無窮亦
何必藏名山而納石室也真卿昔觀光乎天府實荷公
之獎擢見命爲序豈究端倪時則承泰元年仲秋之月
至若世系闕閱蓋存諸別傳此不復云

懷素上人草書歌序

開士懷素僧中之英氣概通疎性靈豁暢精心草聖積
歲時江嶺之間其名大著故吏部尚書韋公陟觀其筆
力勗以有成今禮部侍郎張公謂賞其不羈引共遊處
兼好事者同作歌以贊之動盈卷軸夫草藁之作起于
漢代杜度崔瑗始以妙聞迨乎伯英尤擅其美義獻茲
降虞陸相承口訣手授以至于吳郡張旭長史雖恣性
顛逸超絕古今而楷法精詳特爲真正某早歲嘗接游
居屢蒙激勸教以筆法資質劣弱又嬰物務不能懇習
迄用無成追思一言何可復得忽見師作縱橫不羣迅

疾駭人若還舊觀向使師得親承善誘亟揖規模則入
室之賓舍子奚適嗟嘆不足聊書以冠諸篇首

送劉太冲序

劉太冲彭城之華望者也自開府垂名于宋室澤州攷
績于國朝道素相承世傳儒雅尚矣夫其果行修潔斯
文彪蔚鄂木照乎移華龍驥驤乎雲路則公山正禮策
高足于前冲與太真嗣家聲于後有日矣昔余作郡平
原拒兇殘而請與從事掌銓吏部第甲乙而超升等夷
爾來蹉跎猶屑卑位雖才不偶命而德其無鄰故冲之

西遊斯有望矣江月弦魄秦淮頂潮君行句溪正及春
水勗哉之子道在何居

送辛子序

醇白之士曰隴西辛晃銳業班漢顓門名家十五而志
學克明五十而勵精益懋拳拳不失慕回也之服膺袞
袞可聽同茂先之善說昔我高叔祖鄆州使君著決疑
一十二卷問答稱爲大顏曾伯祖祕書監府君集註解
成一十二帙名儒斟酌煩省摭撫英華勒成三十篇名
之曰漢略夫其發凡舉例晃序言之已詳惜乎困于縑

緗不獲繕寫遂使精義沈鬱闇然未彰吁足嘆也二月
初吉金陵氣暖抵淮上之諸侯所如必合及滁川之美
景未至方歡羣子賦詩以寵之

文忠集卷十二

文忠集卷十三

唐 顏 真 卿 撰

記

東方先生畫贊碑陰記

東方先生畫贊者晉散騎常侍夏侯湛之所作也湛字
孝若父莊為樂陵太守因來觀省遂作斯文贊云大夫
諱朔字曼倩平原厭次人魏建安中分厭次為樂陵郡
又為郡人焉厭次今移屬樂安郡東去祠廟一百甲故
厭次城今在平原郡安德縣東北二十二里廟西南一

里先生像今則捏素爲之并二細君侍焉郡嘗爲德
州其贊開元八年刺史韓公思復刻于石碑真卿去歲
拜此郡屬殿中侍御史平公列監察御史閣公寬李公
史魚右金吾曹宋公審咸以河北採訪使東平王判
官巡按押至真卿候于境上而先生祠廟不遠道周亟
與數公息家兄淄州司馬曜卿長史前洛陽蕭晉用前
醴泉尉李伯魚徵君左驍衛兵曹張遂麟遊尉韋宅相
朝城主薄韋夏有司經正字畢燿族弟渾前參軍鄭悟
初同茲謁拜退而遊于中唐則韓之刻石存焉僉嘆其

文字纖靡駁薛生金四十年間已不可識真卿因勸諸
他山之石蓋取其字大可久不復課其工拙故授翰而
不辭焉至若先生事跡則載在太史公書漢書風俗通
武帝內傳十洲記列仙神仙高士傳此不復紀焉有唐
天寶十三載季冬辛卯朔建

鮮于氏離堆記

閬州之東百餘里有縣曰新政新政之南數千步有山
曰離堆斗入嘉陵江直上數百尺形勢峭峻壁峻蕭
上崢嶸而下迴泐不與衆山相連屬是之謂離堆東面

有石堂焉卽故京兆尹鮮于君之所開鑿也堂有室廣輪袤丈蕭豁洞敞虛聞江聲徹見人羣象人村川垣若指諸掌堂北磐石之上有九曲流杯池焉懸源螭猶蹙噴鶴味醺渠股引迥坐環溜若有良朋以傾醇酎堂南有茅齋焉遊于斯息于斯聚賓友于斯虛而來者實而歸其齋壁間有詩焉皆君舅著作郎巖從君甥殿中侍御史嚴侁之等美君考槃之所作也其右有小石廬焉亦可蔭而跋據矣其松竹桂博冬青雜樹皆徙他山而栽蒔焉其上方有男宮觀焉署之曰景福君弟京兆尹

叔明至德一年十月嘗在尚書司勳員外郎之所奉置也君諱向字仲通以字行漁陽人卓爾堅忮然抗直易有之曰篤實輝光書不云乎沈潛剛克君自高曾已降世以財雄招徠賢豪施舍不倦至君繼序其流益光弱冠以任俠自喜尙未知名乃慷慨發憤于焉卜築養蒙學文忘寢與食不四三載展也大成著作奇之勗以賓薦無何以進士高第驟登臺省天寶九載以益州大都督府長史兼御史中丞持節劍南節度副大使知節度事劍南山南西道採訪處置使入爲司農少卿遂作

京兆尹以忤楊國忠貶邵陽郡司馬十有二載秋八月
 除漢陽郡太守冬十有一月終于所任官舍悲夫雄圖
 未伸志業已空葬于縣北表附先塋禮也君之薨也冢
 子光祿寺丞昱匍匐迎喪星言泣血自河沂峽湍險萬
 重肩槁足跣板笮引舳凡今幾年皸瘵在目因心則至
 豈無僮僕泉昱之季曰尚書都官員外郎昞克篤前烈
 永言孝思原本志反葬于茲行道之人孰不跋而
 真卿猶子曰紘從父兄故偃師丞春卿之子也嘗尉閬
 中君故舊不遺與之有忘年之契叔明昱昞亦篤世親

之歡真卿因之又忝憲司之寮亟與濟南蹇昂奉以周
 旋益著通家之好君兄允南以司膳司封二郎中弟允
 臧以三院御史偕與叔明首末聯事我是用飽君之故
 乾元改號上元之歲秋八月哉生魄猥自刑部侍郎以
 言事忤旨聖恩全宥貶貳于蓬州沿嘉陵而路出新政
 適會昱以成都兵曹取急歸覲遭我乎貴州之朝留遊
 締歡信宿陘峴感今懷昔遂援翰而志之叔明時刺商
 州昞又申掾京兆不同躋陟有恨如何帝唐龍集後壬
 寅仲夏己卯朔十五日甲午刻于門序之左右

撫州寶應寺律藏院戒壇記

如來以身口意三業難調伏也淨尸羅以息其內行住
 坐臥四威儀攝善心也明布薩以昭其外故曰波羅提
 本義是汝之師則憍陳如之善來迦葉波之尚法諸聲
 聞三歸約衆十四年以八敬度尼羯磨相承其致一也
 至漢靈帝建寧元年有北天竺五桑門支法領等始于
 長安譯出四分戒本兼羯磨與大僧受戒至曹魏有天
 竺十尼自遠而來爲尼受具後秦姚萇弘始十一年有
 梵僧佛陀耶舍譯出四分律本而關內先行僧祇江南

盛行十誦至魏法聰律師始闡四分之宗聰傳道覆
 傳慧光光傳雲輝願願傳理隱樂洪雲雲傳遵遵傳智
 首首傳道宣宣傳洪洪傳法勵勵傳滿意意傳法成成
 傳大亮道賓亮亮傳雲一賓岸超惠澄澄傳慧欽此皆
 口相授受臻至于壺與欽俗姓徐洪州建昌人蓋漢孺
 子之後也二十二尋師于臨川楮山後五世剃髮隸于
 高安龍岡寺遂受戒有唐義淨則譯經上足曰洪州之
 靈傑其秉宣羯磨者曰兩京滌法舊集與文粹同石本
當攷文斷餅作兩京清滌使法下慧欽智度冲深神用高爽行無權實身絕開遮

闡律藏而日月光明騁辯才而龍象蹴踏江嶺之外凜然風生開元末北遊京充福先大德常誦大涅槃經而講之兼明俱舍論維摩金剛經每登講座其下日有二三千人由是名動輦轂屬祿山作亂杖錫南歸居于西山洪井雙嶺之間慕高僧觀顯之遺蹤于寺北劫置蘭若山泉之美頗極幽絕欽雖堅持律儀而志在弘濟好讀周易左傳下筆成章著律儀輔演十卷嘗撰本州龍興寺戒壇碑頗見稱于作者三年真卿忝刺撫州東南四里有宋侍中臨川內史謝靈運翻大涅槃經古臺階

高儼然軒構摧圯有高行頭陀僧智清者首事修葺安居住持明年秋七月真卿績秩將滿有觀察使尚書御史大夫趙國魏公頤以我皇帝降誕之辰奏爲寶應寺仍請山林高行僧三七人冬十月二十三日聖恩允許于是鼎新輪奐其興也勃焉仍請止觀大師法源法泉襄陽乘覺清源善弘羅浮圓覺佛跡十喻餘杭慧達最當州海通海岸等同住董修以資景福僉以爲學徒雖增毗尼未立明年三月乃請欽登壇而董振鐸焉仍俾龍岡道幹天台法裔招提智融白馬法胤衡岳正覺同

德義盈香城藏選龍興藏志開元明徹等同秉法事于是遠近駿奔道場側塞聖像放光而龍王不雨者四旬僧尼等三百五十七人而文士正議大夫前衛尉少卿張延臯脫俗歸真其名曰壞綱爲稱首焉又欽比年已來爲受具者凡一萬餘人江嶺湖海之間幅員千餘里像法於變此皆欽教導之力焉臨川在嶺隅未嘗引律于是二衆三百餘人謂法裔敷演而依止之後有上都資聖寺高德曰還本律主偉茲能深辨嗟嘆而贊美之請于寺東南置普通無礙禪院院內立鎮國觀音道場

請善弘居之以開悟心要雲一上足曰智融精持本事如會尊衆乃命智光等于普通道場東置律藏院初立戒壇以佇欽公之來儀且施肇紀之不朽經營未幾壇殿鬱興庶乎渡海浮囊分毫絕羅刹之請巖身瓔珞照耀有摩尼之光則入佛位而披伽梨者名香普熏神足無極其可勝紀而燕絕乎有唐大歷辛亥歲春三月行撫州刺史魯郡開國公顏真卿書而誌之

撫州南城縣麻姑山仙壇記

麻姑者葛稚川神仙傳云王遠字方平欲東之括蒼山

過吳蔡經家教其尸解如蟬蛻也經去十餘年忽還語
家言七月七日王君當來過到期日方平乘羽車駕五
龍各異色旌旗導從威儀赫奕如天將也既至坐須臾
引見經父兄因遣人與麻姑相聞亦莫知麻姑是何神
也言王方平敬報久不行民間今來在此想麻姑能甦
來有頃信還但聞其語不見所使人曰麻姑再拜不見
忽已五百餘年尊卑有序修敬無階思念久煩信承在
彼登山顛倒而先被訛當按行蓬萊今便暫往如是便
還還卽親觀願不卽去如此兩時間麻姑來來時不先

吳舒帷校

聞人馬聲既至從官當半于方平也麻姑至蔡經亦舉
家見之是好女子年十八九許頂中作髻餘髮垂之至
要其衣有文章而非錦綺光彩耀日不可名字皆世所
無也得見方平方平爲起立坐定各進行廚金盤玉杯
無限美膳多是諸華而香氣達于內外擗麟脯行之麻
姑自言接待以來見東海三爲桑田向聞蓬萊水乃淺
于往者言時略半也豈將復還爲陸陵乎方平笑曰聖
人皆言海中行復揚塵也麻姑欲見蔡經母及婦經弟
婦新產數十日麻姑望見之已知曰噫且止勿前卽求

少許米便以擲之墮地卽成丹砂方平笑曰姑故年少
吾了不喜復作此曹狡獪變化也麻姑手似鳥爪蔡經
心中念言背蚌時得此爪以爬背乃佳也方平卽知心
中所言乃使人牽經鞭之曰麻姑者神人汝何忽謂其
爪可以爬背耶見鞭著經背亦不見有人持鞭者方平
告經曰吾鞭不可妄得也大歷三年真卿刺撫州按圖
經南城縣有麻姑山頂有古壇相傳云麻姑于此得道
壇東南有池中有紅蓮近忽變碧今又白矣池北下壇
傍有杉松皆偃蓋時聞步虛鐘磬之音東南有瀑布淙

下三百餘尺東北有石崇觀高石中猶有螺蚌殼或以
爲桑田所變西北有麻源謝靈運詩題入華子岡是麻
源第三谷恐其處也源口有神祈雨驟應開元中道士
鄧紫陽于此習道蒙召入大同殿修功德二十七年忽
見虎駕龍車二人執節在庭中顧謂其友竹務猷曰此
迎我也可爲吾奏願欲歸葬本山仍請立廟于壇側玄
宗從之天寶五載投龍于瀑布石池中有黃龍見玄宗
感焉乃命重修仙宇真儀侍從雲鶴之類於戲自麻姑
發迹于茲嶺南真遺壇于龜原花姑表異于井山今女

道士黎瓊仙年八十而容色益少僧妙行夢瓊仙而餐
花絕粒紫陽姪男曰德誠繼修香火弟子譚仙巖法籙
尊嚴而史玄洞左通玄鄒鬱華皆清虛服道非夫地氣
殊異江山炳靈則曷由纂懿流光若斯之盛者矣真卿
幸承餘烈敢刻金石而志之時則六年夏四月也

梁吳興太守柳惲西亭記

湖洲烏程縣南水亭卽梁吳興太守柳惲之西亭也繚
以遠峯浮于清流包括氣象之妙實資遊宴之美觀夫
構宏材披廣榭豁達其外睽眾其中雲軒水閣當亭無

暑信爲仁智之所創制原乎其始則柳吳興惲西亭之
舊所焉世增崇之不易其地按吳均入東記云惲爲郡
起西亭毗山二亭悉有詩今處士陳羽圖記云西亭城
西南二里烏程縣南六十步跨菖溪爲之昔柳惲文暢
再典吳興以天監十六年正月所起以其在吳興郡里
西故名焉文暢嘗與郡主簿吳均同賦西亭五韻之作
由是此亭勝事彌著開歲頗爲州僚處而有之日月滋
深室宇將壞而文人嘉客不得極情于茲憤憤悱悱者
久矣邑宰李清請而修之以攄衆君子之意役不煩費

財有羨餘人莫之知而斯美具也清皇家子名公之肩
忠肅明懿以將其身清簡仁惠以成其政絃歌二歲而
流庸復者六百餘室廢田墾者三百頃浮客臻湊迨乎
二千種桑畜養盈于數萬官路有刻石之堠吏廚有餐
錢之資敦本經久率皆如是略舉數者其餘可知矣豈
必夜魚春躍而後見稱哉於戲以清之地高且才而勵
精于政事何患雲霄之不致乎清之筮仕也兩參雋人
之列再移仙尉之任毗贊于蜀邑子男子吳興多爲廉
使盛府之所辟薦則知學詩之訓間緝之心施之于政

不得不然也縣稱繁舊矣今詔升爲望清當受代而邑
人已軫去思之悲白府願留者屢矣真卿重違耆老之
請啓于十連優詔以旌清之美也某不佞忝當分憂共
理之寄人安俗阜固有所歸雖無魯臣掣肘之患豈盡
予言用力之術由此論之則水堂之功乃餘力也夫知
邑莫若州知宰莫若守知而不言無乃過乎今此記述
以備其事懼不宣美豈徒媿詞而已哉大歷一紀之首
夏也

吳興沈氏述祖德記

南齊徵士吳興沈君名麟士郡人也蘊道德晦于邑之
餘不溪家貧無資以織簾爲業故時人號爲織簾先生
精于禮傳嘗自詁訓宗人吏部郎中淵中書郎約累薦
徵爲著作郎高臥不起名重江表臨終遺教依皇甫立
晏棺中貯孝經一卷穿壙三尺置棺平土不設机位四
時地席立酒而奠子爨奉而行之吳郡陸惠曉張融皆
爲之誄徵士嘗製述祖德碑立于金鵝山之先塋年月
淹遠風雨蠹蝕朽字殘文翳而莫分乾元中爲盜火所
襲碑首毀裂嶽然將墮過江二十葉孫御史中丞震移

牒郡國請其封葺或屬兵凶曠而莫修忽有仆樹生于
龜腹盤根抱趾聳榦夾碑疑如工造鬱若神化敲者復
正危而再堅夫德無名遇賢而鍾慶神無質假物以申
應沈氏積善旣遠徵士植德旣深天將興舊族乎吾知
沈之復大也權檢校宗事十九葉于前太廟齋郎怡拜
泣松檟增修舊塋感先碑之隕覆懼遺文之殘闕乃具
他石傳而貳焉崇其本所以尊先也建其新所以嗣德
也以真卿江南婚姻之舊中外伯仲之穆謬忝拜刺見
託斯文刊諸碑陰以傳無朽因改其樹爲慶樹以旌其

美焉沈氏之故事具于家謀今闕而不紀時有唐大歷八年冬十二月

乞御書題額恩敕批答碑陰記

肅宗皇帝恩許既有斯答御札垂下而真卿以疎拙蒙譴粵若來八月既望貶授蓬州長史息今上卽位寶應元年夏五月拜利州刺史屬羌賊圍城不得入恩救追赴上都爲今尚書前相國彭城公劉公晏所讓授尚書戶部侍郎二年春三月改吏部廣德元年秋八月拜江陵尹兼御史大夫充荆南節度觀察處置等使未行受

代轉尚書右丞明年春正月檢校刑部尚書兼御史大夫充朔方行營汾晉等六州宣慰使以招諭太師中書令僕固懷恩不行遂知省事永泰二年春二月貶峽州別駕旬餘移貶吉州大歷三年夏五月蒙除撫州刺史六年閏三月代到秋八月至上元爾來十有六年困于疎愚累蒙竄謫其所採碑石迄今委諸巖麓之際未遑崇樹七年秋九月歸自東京起家蒙除湖州刺史來年春正月至任州東有菘雪兩溪溪左有放生池焉卽我寶應元聖文武皇帝所置也州西有白鶴山山多樂石

于是採而斲之命吏幹磨礱之家僮鐫刻之建于州之駱駝橋東蓋以抒臣下追遠之誠昭先帝生成之德額旣未立追思莫逮客或請先帝所賜敕書批答答中諸事以緝而勒之真卿從焉勒願斯畢瞻慕不足遂志諸禪陰庶乎乾象昭回與宇宙而終始天文煥發將日只而齊暉時則有唐大歷九年青龍甲寅之歲孟秋甲子之日也

文忠集卷十三

禮記